

己未詞科錄

己未詞科錄卷十一

通議大夫廣東提刑按察使司按察使無錫秦瀛輯

叢話三

陸麗京云西陵儷語家有靈虵若儼胡秀如春水仲昭
絢若秋霞故當竝推今世說

瀛按仲昭先生以通儒爲經師一時知名之士多
執贄門下喜游覽竹垞嘗題其西山游記云三年
索米住長安咫尺雲峰欲上難讀罷高文但西笑
開簾試隔女牆看

王碩園吳娶顧亭林先生姪女少受業於亭林故學有

根柢其沒於京師也同里王時春方以明經

廷試在京爲護其喪

雪亭筆記

王維夏碩闢集余未曾見世多傳其日本雙刀歌句云
雀環色黃犀靶黑積鐵傳來海東國風胡歐冶知何人
却帶千年戰場色又結句云莫借它人去報仇尊前且
伴封侯骨詩爲其叔子存賦頗有其祖鳳洲司寇風力

漪淥齋叢語

曲阜孔東塘在廣陵時上巳日招同吳園次諸公共十
二人修禊紅橋賦詩紀事鄧孝威與焉又嘗以九日梅
花嶺登高賓主共六人孝威亦與時孝威以詞壇名宿

齒甚高爲勝流推重余尤愛其枕煙亭聽白三琵琶云
寒日林園尊酒陳琵琶急響似西秦赤眉銅馬千秋恨
譜入鷗弦最感人北極諸陵黯落暉南朝流水照青衣
都將寫入霓裳裏彈向空園雪亂飛白狼山下白三郎
酒後偏能說戰場颯颯悲風飄瓦礫座間人似到昆陽
天寶纏頭竟屬誰四條絃子斷腸時蠻韉窄袖當壚女
今日公然識段師沈歸愚先生所謂盜賊縱橫滄桑變
易與落花時逢李龜年同一感慨者也

吳峻一
峯詩話

予在廣陵五年多布衣交甲辰丙遷乙巳七夕諸詩老
送別禪智寺孫豹人有句云欲問忘情老何名其命禽

難言無所往齊有淚沾襟

漁洋詩話

五言小樂府孫處士數章頗奇略記於此蕭儼向舒州
君王怒未休樓高苦無井不及景陽樓又置酒宣華苑
君王好酒悲韓昭方用事涕淚莫輕垂

池北偶談

孫豹人有抱琴圖小像宗定九題詩云長松千尺挺宜
陽箕踞孫郎態更狂世上知音人不見一絃扯去見嵇

康

今世說

孫豹人本三原人主廣陵學賈三致千金頓自悔曰丈
夫處世不能舞稍取金印如斗大則當讀數十萬卷書
耳何齷齪學富家兒乃僦居董相祠旁名其居曰漑堂

舉詞科時崑山大司寇徐公爲一時龍門四方之士鱗
集仰流豹人獨不事干謁入試不終幅而出

上雅聞其名

命賜銜以寵其行

阮元廣
陵詩事

豹人嘗渡江游焦山中流遇風舟幾覆賦詩云風起中
流浪打船秦人失色海雲邊也知賦命原窮薄尚欲西
歸太華眠王新城愛其句採入漁洋詩話又居易錄豹
人僑居揚州予訪之先以詩云焦穫奇人孫豹人新詩
雅健出風塵王宏不見陶潛跡端木寧知原憲貧遂爲

莫逆交

一峯
詩話

傳山字青主亦字公之侗太原高士其子眉字壽髦能
爲古賦嘗賣藥四方其子挽車晚憩逆旅輒課讀史漢
莊騷諸書詰旦成誦乃行祁縣戴楓仲選晉四家詩父
子居其二

漁洋詩話

太原古晉陽城中有傅先生賣藥處立碑鐫衛生堂藥
餌五字先生筆也先生善醫而不耐俗病家多不能致
然喜看花置病者於有花木寺觀中令善先生者誘致
之聞病人呻吟僧言羈旅無力延醫先生卽爲治劑輒

應手愈

茶餘客話

瀛按青主先生高節苦行願以遺民終受職非其

志也顧亭林酬傅處士詩云清切頻吹越石笳窮
愁猶駕阮生車時當漢臘遺臣祭義激韓讐舊相
家陵闕生哀回夕照河山垂淚發春花相將便是
天涯侶不用虛乘犯斗槎申鳧孟懷太原傅青主
詩云曾約溪邨訪釣竿數年設榻待君歡亂離苦
憶良朋少衰病應愁遠道難晉國山川容白髮中
原天地此黃冠幸將卷帙傳高跡自向晴窗展畫
看讀兩公詩可以想見先生風節

曹侍郎使陽和時與客早飯有言關廂外爲集頗盛遣
門客倪生往視歸詢之云無可銜物祇一建窰大士像

甚佳其龕製亦雅惜指壞其一非全翫也侍郎云房中
正需此作禮供具盍佑之遂出錢一緡嚮以示妾妾剪
墨紗幘龕門晨夕作禮甚虔且密及踰年將去陽和侍
郎慮馱負累墜謀送之僧舍妾不可決計請行因開障
捧其像出裹以綿仍置龕開視之則五指完具並無壞
家人大駭以報侍郎不信且疑當時或未壞回憶閒適
朱檢討竹垞至竹垞當時見其事與質記並言壞一指
無異時有誦雲門千指頌以相答者曰乃知千手指卽
作無指觀此竹垞在京師飲次爲余言甲子六月日

河西

秋嶽生平長於經濟未竟其用乃獨肆力於文章諸體
雄駿其詩原本少陵蒼老之氣一洗嫵調晚年自號鋤
菜翁蒔花種竹置酒唱和無虛日愛才若渴四方之士
倚爲雅宗者四十年

櫟李詩繫

倦圃先生居憂不應

召試杜門著述首輯學海類編其書精簡蓋唐宋元明
以來祕本先生盡得之綜三百餘種誠龍威之祕寶也
禾中同學沈子林茂手寫類編目錄一小本贈予挈以
自隨至淮上程魚門見而玩不釋手今不知歸何所矣
猶記經部有趙汭金鎖匙集部有竹翁硯說一卷先公

詞壇紀事二卷詞家辨証一卷吾里止採二家

鶴徵錄輯

先是鴻詞之徵政府首推先生以書堅辭云溶爲東家婦焉能復理裝效西家鬻乎吾禾有朱彝尊李良年徐嘉爰皆淹雅閑通深達國體其材施之無所不可先生推轂士類如此逾年三人皆就徵竹垞勝力並入史館

胡虞環山偶筆

瀛按先生入蜀時先宮諭方在湖廣戎幕以詩寄憶云共承

新詔賦從征遠道君過白帝城劒閣寒雲歧路夢金閨殘月別時情孤生敢作三秋怨老輩猶爲萬

里行匹馬亂山無定處相逢誰識舊公卿既而先生自蜀歸不復出旋沒竹垞先生輓以長律六十四韻中有云軍興還轉餉戰勝屢登輓未睹勛書策翻令祝代庖清時臥安石奇計老居鄭種樹鄰初地爲園樂近郊正指入蜀及歸禾中事也

汪蛟門與太守金公長真復修平山堂成四遠賓客咸集曹侍郎秋岳首爲長律五十韻屬和者五十餘人時寧都魏叔子蕭山毛秋晴並擬重建平山堂記宣城施愚山撰平山堂記序江南北傳爲盛事又於堂後拓地爲樓五楹設栗主祀歐陽永叔劉仲原父蘇子瞻名曰

真賞之樓用永叔寄仲原父詩中語也秀水朱竹垞作

真賞樓記

廣陵詩事

蛟門比部倣蕭琛作少壯三好圖謂音律詩酒也圖今

在秦敦夫編修家蛟門又有聽瑟圖

同上

汪叔定耀麟季角懋麟弟兄並以詩名季角寄兄諸詩

每以子瞻子由相況如七月十八日與叔定別於甘羅

城黃河隄上詩用東坡鄭州西門外馬上寄子由韻歷

下亭中秋有懷叔定詩用子由南京寄東坡韻又家兄

來白田爲余生日詩云買犢春來學耦耕篋中舊筆已

無情卯君生日誰當念多謝年年白髮兄卽本東坡爲

子由生日詩中意也

同上

蛟門以才名擅一時漁洋詩話云江都門人汪季角詩才雋異古文學王介甫游吳題寒山寺云吳中池館日吹簫只有寒山寺寂寥搖落江楓對漁父行人歸去雨瀟瀟題顧符楨畫云昭陽顧生畫樓觀絳闕瑤房生白雲如螳宮人三百六丰神都似李將軍徐虹亭云蛟門天祿燃藜金門據地彈碁頌酒不減名輩風流常於清明日集諸名士送朱十錫鬯之揚州云今年二月已春分白袷單衣暖氣曛欲唱渭城誰進酒綠楊柳外見紅裙又云揚州勝事滿林皋此去猶能賞碧桃無數畫簾

鉤落日一湖春水漾輕篙情致妮人論者以爲酷似微之牧之也

沙村偶記

瀛按蛟門比部嘗夢得十二硯因自顏其齋曰十二硯齋魏叔子朱竹垞諸君子多爲之記其家又有百尺梧桐閣寫長卷乞漁洋先生題之句云別館多梧桐偶此成幽寂獨向高閣眠夜聞疎雨滴百尺高樓上何人相往還夕陽海門樹秋雨江南山

汪淮按家蛟門先生沒之年二月會客有可憐燈月是今年之句意頗悲涼及病絕筆詩云半生心

事無多子祇在儒生法吏間顧書宣太史感慟甚
深作詩用張籍祭韓文公體祭之

順治乙未科三鼎甲鄞史大成官至侍郎滄州戴王綸
無錫秦鉞皆外轉一爲江西糧儲道革職一爲江西按
察使降湖南糧儲道王綸嘗舉博學鴻辭未與試乙未
翰林革職以詞科重入史館者對巖先生一人而已先
生卽鉞之族諸孫

游諒齋叢語

陸清獻令靈壽嘉定爲天下第一循吏魏敏果嘗特薦
之官御史直聲震朝野其沒也家貧久不克葬崑山徐
尚書與清獻爲同年友欲葬之而尚書亦旋沒清獻生

平墨守程朱湯文正則宗姚江良知之說書問往復辨
難要皆一代儒宗也或傳清獻沒後爲嘉定縣城隍殆
不經之談耳

先君子也
軒筆記

惠研溪先生邃於經學其詩却明白如話如出門五古
云浮雲翳清晨孤帆雨初注結束上高堂迴遲更千慮
苦心發懽顏但道舟楫具小兒不知愁牽衣乞同去不
忍與明言多方便之誤遂行雜親朋刺刺語及莫風急
雨漸稠篙師動微怒郎今何多談明日誰與訴又夜坐
有懷起句云青天如澄江片月初洗出語極超妙

也軒
筆記

沂水高平仲中丞崇禎辛未進士官河南巡撫歸殉王

午之難初登第觀政京師製衣一稱寄內自畫花卉其上凡二十六種作三十二叢各題絕句八首張杞園待詔作畫衣記詩略載於此對月偏成憶臨風更有思鄉心無可寄聊寫最嬌枝花枝嬌且妍置之在懷袖好記花枝新憐取衣裳舊輕襦畫折枝悠然感我思畫時腸已斷著時心自知霧縠偏宜暑冰綃迴出塵著時憐百朶應憶畫眉人客邸長安一事無畫長人靜影形孤閒將一段鵝溪絹寫作名花百種圖思致亦極清韻可誦

漁洋
詩話

錢葆汾總角卽好倚聲酒肆粉牆倡家團房每因興會

輒有斜行說今世

葆鬻擅詩歌尤精倚聲神似玉田徵車到日服尚未闕
遂不赴試後以孝廉爲中書舍人竹垞翁稱其詞可方

駕南北宋鶴徵錄
續補

陳迦陵題爰琴小像云隋宮絲管曾醉倡家紅玉梳瘦
馬蘆溝又上燕姬賣酒樓十年一別往事濛濛那可說
畫裏逢君同把揚州月色分爰琴客游四方豪宕不羈
其風致如是先高祖徵
雲堂偶記

彭爰琴五古如出宣州過箬嶺入歙州界遇雨七古如
夜飲閭再彭席上聽孫良侯搥鼓歌皆可傳再彭百詩

父也爰琴又有寄懷閭再彭詩云徒勞問荅皆賓戲始信文章果說難弟極亦工詩

鮑汀若洲雜記

彭子爰琴善游嘗云登泰岱臨日觀觀秦漢以來所用事處爲詩紀事時人擬之北征南山又徧歷漢沔走豫章匡廬諸勝與山僧道流棲遲者數月而後出故其詩託寄高遠驟卽之不可得其徑術旣而悠然與之俱深往而不能返矣

摘錄姜宸英芙蓉閣詩序

陶章鴻案爰琴膺薦舉以母疾辭陳情至再中丞慕公天顏爲之疏請旋遭母喪

柯子翰周與其兄寓匏肆修並有才名以詩歌相奮勵

與人交恂恂謙謹前年周子青士寓予洞庭紀游一帙
既歎寓匏聿修之工於詩今復讀翰周之詩於長安驛
旅中不可謂非厚幸也

摘錄李良年燕
臺錄別詩序

嘉善柯寓匏翰周兄弟家有園亭之勝皆工填詞竹垞
翁居梅會里頻過之江湖載酒集中句云勝侶重攜穿
竹語添結茅亭心許沙鷗住爲翰周作也又有集唐調
寄浣谿沙煙柳風絲拂岸斜遠山終日送餘霞碧池新
漲浴嬌雅云云自注同柯寓匏春望

徐流方
尺牘

查揆案吳星叟云柯素培長君寓匏次君翰周皆
戊午同徵是年素培六十翰周徵文以壽而凶問

遽至兩君卽以外艱歸

葉元禮素病羸然頗不耐杜門客有憂之者或笑曰猿狙之性動而彌壽予亦有詩規之

說鈴

吳騫按元禮少補諸生丰標韶令嘗過垂虹橋樓頭有女子見而慕之遂病不支死之日葉復經橋畔其母以聞葉入哭之女目始瞑同人各製詞以誌其事

郁東堂五古悲歌六章沈文慤稱其步趨少陵七章風骨神味自合余尤喜誦其猛虎行云猛虎突出勢恒怒不住深山踞當路風高月黑聞嘯聲四野行人盡迴步

一虎之猛尚可當羣狐假竊牙爪張豈無壯士欲手搏
出門四顧心旁皇耽耽余威誰養就昔猶昏莫今白晝
瞑目從教凡獸驚肥身那管飢民瘦虎兮虎兮知懼無
灞陵亭下秋草枯飛將醉發金僕姑石猶飲羽况余乎
傷心之言豈亦所謂苛政猛於虎者耶

吳蘭庭胥
石筆談

瀛按東堂與亭林先生友有東亭林詩蓋亦志節
之士

應潛齋先生生明季時大江以南社事方盛杭有讀書
社小築社登樓社僅以文詞相雄長先生稍後出而於
狷社中別有所主生平墨守程朱不喜陸王之學姚江

黃晦木嘗嘗之然其踐履篤實涵養從容與人師也沒
葬龍井山下二子皆無後余嘗游杭訪先生墓不可得
也軒
筆記

山陽張吏部新標爲中書舍人時故相陳公名夏得罪
死無敢殮者公慨然曰溧陽死於法固未嘗禁殮葬乃
集同志釀金命老僕張臚製棺衾具殮老僕嘗曰我乃
相公義兒公絕口不言也
松窗
筆乘

鞠存子涇原檢討由中書擢吏部主事以文學吏才稱
於時與稽宗孟姻親父子翁壻並膺薦舉士林傳爲佳

話
杭世駿
筆記

范彪西先生嘗有書致王新城略云丁丑三月恭奉手
教確是講學之書卽如論文成一節名正言順馮恭定
公有言除却氣節事功文章將於何處見道學先生云
陽明卽不名道學而氣節事功文章皆是第一流人物
豈止以道學予文成哉爲萬世立公論爲昭代嚴祀典
也近日時文選家竟指文成爲異端狎侮前哲訕謗學
官先生謂其無羞惡之心某更謂其失爲下不倍之道
也至於黃黎洲學案曾見原稿屬意處專在文成亦屬
偏見某取其收羅明儒之富兼取其自序處不諱淺深
各得醇疵互見之意故統錄之以備參考此霍渭厓之

所以失入也先生公論竊欲添註於渭厓幅中以見後
人眼目欺瞞不得誠有如東林諸賢會議者可否候裁
敝鄉辛復元先生學本闇然某雖極力表章而人微言
賤今不與荒煙蔓草同歸泯歿者實自康熙二十二年
十月十二日大疏始矣跡此舉動因輒以小刻備攷兩
集僭瀆左右妄干元晏旣荷俞命敢不拜嘉河東分守
吳公入境卽齒芬見及雖未謀面一時枯木春而冷灰
然先生之德愛噫甚矣過矣長白山錄考核博而有要
篋中著作如織倘惠然肯來引領望之

彪西文集

嵇淑子居官清介張鞠存吏部嘗過之見其衙齋卑陋

不蔽風雨案牘筆墨與泥塗相揉襍却鯨懸魚一埤交
謫殆有中人之產所不能堪者

今世說

于清端壽蔡忠襄公夫人八十詩序云中丞蔡公以明
末甲申二月太原城陷自縊於三立祠今越四十載余
以西河後進謬叨兩江節制來莅金陵適公子方炳應
纂修通志之聘獲與周旋詢公家世清白門戶零落之
狀爲之太息方炳言其母顧太夫人年八十因賦詩四
章以贈之詩不備錄方忠襄殉難後藁葬晉陽城外順
治戊子先生始偕弟方爝往負柩歸戊午徵聘不出舊
傳

召試日因不能奏對增廣生扶出此好事者之言也也

筆記

余聞二曲先生之孝也關中人人頌之駱使君執弟子禮敬事之辛亥延至吳中春仲至止吾錫不拜一客不接一賓講道於明倫堂秦氏淮海宗祠與予若有夙契每於空庭露坐談及他人之事親輒仰天大呼淚落不已清夜晨興時聞哭泣余亦不敢問先生爲何事猶強以朱夫子山川出雲閒身空谷之句爲寬慰掩淚言別別去經年而始知先生之志在襄城也本於至性之精誠發而爲無可柰何之極思先生至襄而襄之茂宰東

峯張公邑紳孝翁劉公羣起而治大冢成義林以修祭
享緝志乘以垂永久若奔命之不遑感於義也

高世泰
襄城記

異書
後

關中李隱君容之父信吾翁諱可從崇禎壬午佐制府
汪忠烈喬年剿賊襄陽城陷翁從忠烈死之隱君方三
歲既壯以母在不獲覓骨及母歿至襄陽號泣以祭淚
盡血繼觀者哀之襄人劉宗洙割腴田立塋兆私諡忠
武暨碑祠祀以慰孝思邑令張永中表于道曰義林祠
碑告成之夕羣工未寢忽鬼聲大作衆皆震慄允中作
襄城記異顧亭林爰武題云踰闕荒郊酌一尊白楊青

火近黃昏終天不返收峭骨異代仍招復楚魂少室愁
雲隨獨鴈潁橋哀水助啼猿五千貂錦皆忠義孰似南
山孝子門

蘭村
筆乘

義林圖襄陽劉宗泗寫明殉難材官李可從招魂葬地
也宗泗跋云泗非能畫者睹茲義林感慨係之聊卽形
勢狀其梗概庶幾覽者如登其林慨然想見其英風洛
中王屏翰題句云城頭慷慨誰同調墓地蕭條有比鄰
蓋宗泗之父某壬午與可從同殉難者義林地宗泗所
捐其父葬地卽居其左

淶汀
詩話

瀛按先生嘗客無錫以康熙十年二月六日先燈

巖公偕先宮諭邀先生講學於淮海祠聚宗人及諸同志各質所疑次晨先燈巖公持一縑詣先生謝先生因辭公曰昔董蘿石北面陽明持一縑而前曰某之誠積若茲縑矣某今獲奉教先生願附斯義先生退而與陳介夫敘其語爲梁溪應求錄黃梨洲先生前明遺老爲海內推重一時碑版多出其手陳其年求爲先人志墓詩云熹宗之朝盜竊枋國事稠濁由諸閹刊章告密滿天下劫火烈烈崑岡爰忠端骨鯁填牢戶少保強項遭髡鉗三朝要典亂白黑爾曹病熱徒狂譖膺滂之後愛名節翁與吾父均酸鹹忠泉

出井流不涸孝筍拔地天能參東都壇墀立名字西園
鷗閣紛往檐懷寧亂鬢老愈怒矯尾直拂鍾山巖我師
秋浦魁壘士便樹頤頰張鬚髯一呼袒褐暴猛獸筆陣
霍若霜鋒銛么麼得志逞報復一網盡矣心所甘

王師南下明社屋人頭畜鳴盡夷殲四十年來市朝換
曜靈急景奔驚颿崇文門外黨碑倒沙石磨治落紋嵌
平生先子膠漆友半作黃葉經秋芟晨星落落只翁在
開元軼事餘誰譜先朝鉤黨有本末冰玉硃碧秋陽遲
今人往往咎過激毋乃醜正叢譏彈嗚呼吾父沒已久
墓門鬱鬱愁松杉累翁一片道旁碣請放健筆爲雕鐫

詩於熹宗及南渡時朝局憤切言之而黎洲定生兩先

生風節俱見墓志今刻南雷集中

若觴叢話

明儒學案黎洲先生書也先官諭評閱數過丹黃滿紙
嘗言是書誤入霍韜此外亦間有可議要爲前明一代
道學所繫先公論學晚宗敬軒而先生則上推陽明以
迄菰山派微不同而虛心推挹如是

也軒筆記

鄭基陽與文震孟黃道周兩公爲石交溫體仁欲借基
陽以傾兩公遂被慘酷黃黎洲先生表基陽墓傾挹甚

至足爲基陽訟冤矣

環山偶筆

黃氏攜殘集黎洲徵君手訂也黎洲著述甚富獨此集

不傳最爲崑山徐氏稱許余偶於坊肆買歸板刻甚精
黃珣文僖公集黃文煥開州集黃韶道南先生集黃嘉
仁半山先生集黃嘉愛潁川集黃元釜丁山先生集黃
尚質景州集黃伯川蟄菴先生集凡八家梨洲有序詩
文皆不能高出一代要爲世所不經見之本矣

法式善
初西雜

記

瀛按潛邱徵君聞梨洲先生之訃與先生門人顧
諶楊開元會哭曰已矣吾不獲親及先生之門矣
海內讀書種子盡矣真天喪我顧諶曰昔聶雙江
欲師事王文成而未逮文成薨後始因門人錢緒

山爲介執弟子禮獨不可援此例乎况先師實許
子徵君曰然遂哭拜成禮復爲文以祭之其文云
世有東坡萬里當訪區區千里而不能往銜痛蒼
穹結恨黃壤如何可贖瓣香敬仰

周春按黃徵君應海寧令許三禮之請講學北寺
從游甚衆蓋吾邑祝先生淵受業戔山而徵君亦
以戔山之學倡導後進時石門呂某自命爲得紫
陽道脈攻姚江甚力至海昌願見徵君徵君僅令
其子百家見之某拂然去其後竟敗徵君殆有先
見所著尚有懷舊錄行朝錄全謝山先生序之

徐熊飛按蕭介石嘗見李鄴園制府論浙中人物
李云初意願舉先生渠母老不可故不强之先生
子百家字主一長於天文律呂先生不就舉命百
家至與修明史著有體獨私鈔學箕五稟

寧都魏叔子與予定交江都時歲在辛亥明年予將返
秀水錢唐戴蒼爲畫煙雨歸畊圖叔子適至題其卷於
是叔子亦返金精之山蒼爲傳寫作看竹圖俾予作記
叔子過予言金精之峰十有二其一曰翠微易堂在其
上梧桐桃李橘柚皆植獨竹不生種之自叔子始近乃
連岡下上無非竹者

摘錄書亭
集看竹圖記

魏氷叔乃志節之士與其兄弟隱居翠微峯治古文之學縱橫雄傑當世罕儔近出游江淮來至吾邑昨與接晤上下千古眞天下奇男子也翌日可同赤仙往過之聞渠在此候顧景范竢景范至卽移舟詣吳門訪徐昭法耳

秦沅東族弟樂天啟

陳鱣按叔子文甚雄奇或病其敘事學史記處間似有小說氣此乃指大鐵椎傳等篇耳它如姜嫄江天一諸傳皆絕大有關係文字何可多得叔子姪世傑早死世倣亦奇士也竹垞有贈世倣詩云每憶金精天外峯易堂書卷闕春冬竹林舊侶嗟

零落喜見青雲阮仲容

明季公安竟陵之學盛行以迄於亡惟顧黃公杜于皇
生於其鄉能不染其習黃公才氣尤橫著述頗夥雖語
多蕪雜要亦一時之雄也

也軒
筆記

頃來京師觀山史所攜書畫聊記之定武蘭亭五字未
損本有米元暉宋仲溫二跋又仲溫臨趙文敏十七跋
又興唐寺石刻金剛經貞觀中集王右軍書又漢華山
廟碑沈石田秋實圖三物皆華州郭宗昌允伯家物皆
有允伯跋華山碑有虞山長歌卽所謂郭香香察未遑
辨者也又李營邱古木賈秋壑題詩語潦倒可笑華亭

董宗伯得之南充陳文憲公者有跋又唐子華水仙圖

甚妙今諸物惜不知流落何所矣

池北偶談

王子旣與予定交因出是集示予讀孫督師傅庭公傳采輯情事旣詳且核加以敘次簡潔有法頗得太史公傳傳傳斲剝成之遺意王子多諳前明故實尤好鑑別唐宋以來法書名畫平生爲文甚夥其議論馳騁今古悉有依據非苟作者

摘錄江琬
砥齋集序

山史先生工書法博學能古文酷嗜金石王阮翁稱爲博物君子所著十七帖述并註極雋而核又刻華州郭宗昌金石史家藏漢唐以來金石文字甚富古文辭亦

嫺雅已未徵至京師居城西昊天寺不謁貴游遂以老
病辭不入試罷歸關中所居華山下有讀易廬潔樸無
纖塵阮翁典試滇南嘗訪之山居聯額皆孫鍾元鄭谷
口李天生諸名士書其獨鶴亭在華北與三峯相向嶽
影滿窗陰翠可愛易圖象述等書卽讀易廬中所著鶴
微
錄續
補

瀛按先生以戊午應薦到京己未不與試遽歸王
新城尚書送之詩云華山丹頂鶴清唳向西峯不
羨三株樹常栖千歲松林巒有佳氣暝起日高春
石上流泉好菖蒲方紫茸

余少時與章君含可同以小試受知於王雪于師予爲
怨家所構會順治辛卯章君登賢書遂於填親供時爲
予訟冤於部使軍門一時聞者爭頌之

西河集

瀛按先生叔正宸字羽侯崇禎辛未進士官給事
中能強諫後戍襄陽復職丁艱鼎革後爲僧

閻若璩百詩云漢古詩明月皎夜光一篇玉衡指孟冬
漢以十月爲歲首此孟冬乃建申之月指改時而言下
文秋蟬鳴樹間爲明實候故以不改者言唐儲光義詩
夏王紀冬令殷人乃正月則又和盤託出楊升庵曰唐
人不辯而自了然足也唯宋儒始生異說明人出而益

滋妄解矣

居易錄

此條前段從來辯夏正周正者幾成聚訟百詩近著博湖掌錄有改歲改時改月解一篇最博而核聊記於此事有爲當代所通尚習聞習見隨人舉及言下輒知此屬某彼屬某不復煩疏解者三正之通於民俗亦其一也予嘗以豳風七月詩言月夏正也言日周正也周禮太宰小宰正月建子也正歲建寅也一篇一官之中已交錯言之然猶曰字有不同也若何以卒歲夏正之歲也曰爲改歲周正之歲也月令季秋曰來歲秦正之歲也季冬曰來歲夏正之歲也十月蟋蟀入我牀下夏正

之十月也十月之交朔日辛卯周正之十月也臨卦至
于八月有凶商之八月也玉藻至於八月不雨周之八
月也月令孟春乘鸞路夏之孟春也明堂位孟春乘大
路周之孟春也臣工詩維莫之春周之莫春也論語暮
春者夏之暮春也明堂位季夏六月改時與改月也左
傳襄十四年正月孟春不改月與時也君牙夏暑雨冬
祁寒不改時卽不改氣者也雜記正月日至七月日至
改月却不改節者也左傳昭十七年當夏四月建巳也
於商爲四月建辰也武成唯四月顧命唯四月建卯也
郊特牲歲十二月孟子歲十二月建亥也伊訓十有二

月三統歷商十二月建子也夏小正十月二月凌人十二月建丑也四代之制連類錯舉昭昭別異然猶曰書有不同也若曾子一人口中病于夏畦夏夏之夏也秋陽以暴之秋周之秋也趙岐注周之秋夏之五六月盛陽也郝仲輿曰周以五六月爲秋陽光燥烈金遇火伏暴之極乾也夫以暴物極乾言有不須午未月之陽者乎同一絳縣人之生正月甲子朔在晉爲七十三年在魯則七十四年也同一史蘇之占六年逃明年死在晉則合在魯中隔一年也所以者何用夏正與周正之不同不唯此也昭元年正月趙武相晉祁午曰於今七年

及至秋醫和曰於今八年所以者何昭元年正月仍晉
平公十六年十一月昭元年秋則晉平公十七年之夏
或秋也以至三統歷殷十一月戊子後三日得周正月
辛卯朔周正月殷十二月洛誥傳以十二月戊辰晦到
明月爲夏之仲冬夏仲冬周孟春云云按閻太原人詠
字復申之父也博學好古遷於經學愚既錄解末一段
復具載全文與研經者參之

帶經堂詩話附識

閻潛邱遺書惟四書釋地三續宋商邱刻於吳校正困
學紀聞馬秋玉刻於揚州其尚書古文疏證孔廟崇祀
末議孟子生卒年月攷則里人刻之孫學林刻潛邱劄

記如日知錄補正喪服翼註毛朱詩說續朱子古文疑
宋劉攽李燾馬端臨王應麟四家逸事皆未刊劄記乃
未定書零箋碎紙投棄一筒揭館後家人與計簿混入
笥中學林不知抉擇他人往還手蹟及陳言狎語游
戲之詞悉條舉而刻之硃玉並陳大失潛邱面目予嘗
刪存十之五六卓然可傳不朽又盧日堂嘗手輯潛邱
緒論一編曰問氏碎金皆洞庭書局中辨論之事今無
傳又博湖掌錄一書吳山夫少年時猶見鈔本予尋之
二十年無有知是書者王漁洋稱其博雅精核手錄其
盤谷一條辨李愿非西平子亦全鼎之鬱也

茶餘
客話

閻百詩先生年十五補山陽縣學官弟子。學究經史深造。自得嘗集陶貞白皇甫士安語題其柱云。一物不知以爲深耻。遭人而問。少有寧日。其立志如此。年二十讀尙書至古文二十五篇。卽疑其僞。沈潛三十餘年。乃盡得其癥結所在。作尙書古文疏證八卷。康熙元年始游京師。尙書龔鼎孳爲之延譽。由是知名。旋改歸故籍。太原爲諸生祭酒。崑山顧先生炎武游太原。以所撰日知錄相質。卽爲改訂。數條顧虛心從之。十七年應博學鴻詞科試。不第。在都門與汪編修琬交。汪著五服考異成。先生糾其繆數條。注意不憚。謂人曰。百詩有親在而喋

喋言喪禮可乎先生應之曰王伯厚嘗云夏侯勝善說
禮服謂禮之喪服也蕭望之以禮服授皇太子則漢世
不以喪服爲諱也唐之奸臣以凶事非臣子所宜言去
國恤一篇識者非之講經之家豈可拾其餘唾乎徐尙
書乾學因問於經亦有徵乎先生曰按雜記曾申問於
曾子曰哭父母有常聲乎申曾子次子也檀弓子張死
曾子有母之喪齊衰而往哭之夫孔子沒子張尙存見
於孟子子張死而曾子方喪母則孔子時曾子母在可
知記所載曾子問一篇正其親在時也徐大歎服卽邀
至邸延爲上客每詩文成必屬裁定曰閻先生學有師

法非吳志伊輩可望及公奉

敕修一統志開局洞庭山旣又移嘉善復歸崑山先生

皆與其事

顧棟高萬
卷樓雜記

世宗憲皇帝在潛邸卽聞太原閭若璩名手書延至京
師日索觀所著書每進一篇未嘗不稱善疾革請移就
外留之不可乃以大牀爲輿上施青紗帳二十人舁之
出安穩如牀簀不覺其行也卒年六十有九時康熙四
十三年六月八日

不是齋
筆記

朱竹垞檢討博極羣書少所推許其酬問若璩詩云烈
火燔帝竹秦鏡忽以淪番番濟南叟後死耄而勤腹笥

傳少女齒落餘空齟掌故潁川來何繇聽其眞所怪張
歐陽疑義嘿不申金絲魯宮響科斗幡輪困俄遭巫蠱
發竹簡迹久湮梅生千載後一一紛羅陳其餘航頭字
摺撫亦有因譬若完衣裳安用重補紉文從義艱晦體
殊絕蹤塵孔書旣咸在謨誥恒鮮新何不正今譌去險
歸溫純此義誠難知疑者頗相循閭生并州彥徙宅清
淮潯昨年應

詔至旅食春明春小心對縫掖餘勇刺古人示我一編
書其言狂且醇諸家援王吳百氏搜墨荀幽室抉竅奧
希音辨韶鈞雖爲見者駭猶勝徒咕呻吾生嬾述作老

矣潛悲辛君非漢井丹經義何紛綸况有紈扇詠贈我
情彌親客子寓招提不出動盈旬春冰玉河裂草暖波
粼粼紅杏舒繁條翠嵐壓重闔相期出郭游西山恣迴
巡並馬騁劇談九皇八八民醒卽坐松石醉卽臥花茵
蓋百詩以膺薦在京師竹垞酬贈之作傾倒於百詩至
矣

也軒
筆記

百詩父牛叟母少姜牛叟兌開遣徽曰余填詞成妻恒
爲解頤偶製杏花天三闋妻索書素帕出入懷袖中迦
陵嘗爲牛叟賦云誰填杏花天却滿幅春愁無賴鳳紙
正疊狸毫乍弄龍鸞報道娘來簾外新詞訝輕狂一半

是狂奴故態幾徧繞柱循廊一回暗想胡猜蹙他蛾黛
頰容旋解畢竟是清新堪愛烏絲小楷要麝墨親灑今
日營齋營葬訖石竹羅裙早壞裙帶字斜行還在誦此
詞可想見牛叟伉儷風致如此而百詩又能以經學名
世亦奇矣

劉松蒼雪
坡詞話

己未博學鴻詞之舉田綸霞以工部郎中與焉己而被
落題溫飛卿集後云一代才名乾癸子八义吟手亦徒
然不教詞賦陪雕輦空讀南華第二篇然不十年官至
巡撫江南僉都御史

漁洋
詩話

田公嘗舉博學鴻詞一時名士率皆懷刺跨馬日夜詣

司枋者之門公獨屏居蕭寺中不見一大人長者今之
來江南也舁以肩輿從兩驢載衣裘一箱五經子史兩
方底蒼頭奴兩人蹢蹢行道上戒有司勿置郵傳給供

張

節錄惠周惕送
學使田公序

田山莖雲未入翰林弟需館選後寄以詩云此事亦尋
常于我獨無分先是裁推官改知縣山莖就試中書第
五入署視事遭同年翰林某侮辱嘗歎云北門草制始
自乾符內翰宣麻號稱供奉笑彼紛紛乳臭標勝氣於
眉稜亦且截截誦言誇清班於頰舌又詩云休言京兆
除書近搖落於今已六年及試博學鴻詞首先交卷復

被黜有題溫飛卿集後詩不十年官大鴻臚巡撫江南
又題陸賈傳云坑焚滲漏笑強秦劉氏功馮馬上臣椽
史武夫兩行隊中間迂腐一詞入此當有所指陸在漢
初頗有文藻新語外春秋後語南中行記感春引典故
文心雕龍載其目是爲子虛上林之先聲也

茶餘
客話

瀛按先生詩取材宏富或病其不無少襍然如晚
投臥佛寺宿云峯銜新月黃雲擁山容變又云疎
燈出深竹依微露紺殿山脚晚行云水樹色相映
淨綠生衣裳日薄無倒影石髮有冷光清微淡妙
仍是王孟遺響至其泊舟吳門寄汪茗文詩云渺

沙太湖水遙遙光福山梅花一萬樹窈窕非人間
思與堯峯叟扁舟數往還煙巒七十二坐嘯聽潺
湲此則純是唐音亦五律中高格也

瀛又按余有過德州詩云當代風流說侍郎搔爬
騷雅繼漁洋銜泥零落紅襟燕誰認臨溪舊草堂
蓋山薑先生舊有鬲津草堂今不可攷矣曩在京
師漢陽葉雲素繼雯移居用先生集中移居詩韻
示諸同人和者數十家余亦有作

嵇漪園先生世居無錫畱山先生永仁自長洲來與漪
園訂兄弟交故寓公也其子文敏公會筠始著籍漪園

成進士後連蹇不得志而畱山以諸生入范忠貞幕殉
耿逆之難兩人事蹟迥不相蒙惠棟注精華錄於送嵇
爾遐從軍詩下注爾遐殉耿難誤矣爾遐漪園字先宮
諭有新泰道中懷漪園在厯城詩云芳草懷人路中原
靜鼓聲山空春日澹埜曠莫林齊浩蕩鳥投寺遲回馬
過溪何時逢叔夜詩向厯亭題

也軒
筆記

瀛按漪園先生子曾翼能詩顧晴沙觀察採入梁
溪詩鈔孫坡以雍正初保舉才能令河南之儀封
簡傲忤上官罷歸居邑中西溪之上環堵蕭然嘯
咏自得時余方少年落拓常贈余以詩有之子江

東秀飄零安可論之句年八十餘卒曾孫承烈有
吏才由四庫館議敘爲縣丞於浙余言於撫軍阮
公膺薦擢黃巖令甫蒞任以志鬱死

天章詩情高逸當世無輩素耽二氏之書有出世之志
以鴻詞徵赴京師獨不掃門時相所居中條山永樂鎮
唐相李石李福李程兄弟及呂仙巖故里有玉谿卽李
商隱所居

居易錄

吳天章過眞定賦詩云鎮州荷花一萬柄正對城門是
酒家下馬當壚更斟酌醉臨明鏡看吳娃風格殆不減
楊廉夫余與海內論詩五十餘年高才固不乏然得髓

者終屬天章也

分廿餘話

吳天章初至京師未知名余亟賞其詩謂爲仙才一旦待漏朝房誦其句於葉文敏初庵云泉繞漢祠外雪明秦樹根濃雲溼四嶺春泥霑條桑葉大驚異下直卽命駕往訪之吳詩名大噪都下

漁洋詩話

吳天章以博學鴻詞薦在京師偶得漢銅印文曰河聲嶽色雫家蒲州中條山南永樂鎮臨大河對岸卽華嶽三峯也雫有詩曰門前九曲崑崙水萬點桃花尺半魚

同上

天章贈所刻寒山子詩詩家每稱其鸚鵡花間弄琵琶

月下彈長歌三月響短舞萬人看謂有唐調其詩有工
語有率語有莊語有諧語至云不煩鄭氏箋豈待毛公
解又似儒生語大抵佛語菩薩語也

居易錄

漢魏以來二千餘年間以詩名其家者衆矣顧所號爲
仙才者惟曹子建太白蘇子瞻三人而已

本朝大一統閱六十載作者亦多矣余獨以仙才許蒲
阪吳君此予之私言亦天下之公言也君且死語弟霞
曰吾平生知己無逾漁洋先生吾卽死遺詩勿遽出必
待先生刪定雖相望二千里勿憚跋涉而往求焉且得
誌墓之文吾無憾矣予居田里聞君之訃爲哀輓以代

楚些其末云已空文字障靜閱莊嚴劫何事勞結習猶
煩大迦葉未幾霞至將君遺命予詩若爲之識然君姿
秉殊絕嗜書如飲食而尤深於五際六義游京師士大
夫無知其詩者予過同年榮工部洞門見其詩云泉繞
漢祠外雪明秦樹根又曰濃雲溼西嶺春泥霑條桑至
今堯峯上猶上堯時日大異之曰此非今人之詩也君
再入京師一見譚藝輒夜分不休如釋迦之有鷲子焉
山之有寂子相說以解不待往復扣擊君固以謂予一
人知己如后山之於南豐也已未博學鴻詞之科君在
舉中顧獨耽寂守素不與他人走健僕囊巨軸宛顏低

眉望門求知者競馳逐膠牢澹泊門有雀羅予以是益
重之臨胸馮相國以扇索其詩君大書二絕句答之其
坦率如是卒以不遇亦不悔也游跡半天下而梁宋間
詩尤工晚訪舊天津復與予相見京師時康熙辛巳君
年將六十倦游矣嘗買圃鄭谷之口有竹數百挺黃梅
數十株橘三株中作草堂面雷首肘太華怡然自足將
以終老而迄不得遂嗚呼其可悲也君詩一刻於吳中
再刻於都下三刻於津門今未刻尚千餘篇予刪之不
少貸所存者皆卓然可觀

蠶尾續文

天章賦予西城別墅古詩十四首甚工聊錄數篇於左

石帆亭云風動袈裟角洪濤四溟吼如何不搖動片石土囊

口爲賞正定心添種菱三畝樵唱軒云采山因采眞歸來發

高唱衣上煙霞斑雜坐無禮讓身忘草木年心寄尊盧

上小華子岡云右丞禪悟人千古生則倣每思茱萸泝一理

欹湖棹何意春城西犬吠夜如豹小善卷云洞中過天地居

然小善卷焚香還晏坐獨理朱絲弦谿割罨畫水人耕

陽羨田竹徑云欹側徑石路窈窕無凡卉去去綠陰中涼

風動斐亶仙人何處來一萬青鸞尾嘯臺云蘇門有高士

求怒不可得出水仍大笑妙意誠難測爲想鳳鸞音崇

臺願矜式古夫于亭雜錄

吳天章天才超軼人不易及嘗爲予題倪雲林畫云豈
但濃華謝桃李空林落葉亦無多尋常眼前語正自百
思不到上同

蒲州吳天章同年臨穎君之子工於詩迴出流輩五言
如羊山云落日山風吹長松亂清影白雲逗殘雪忽見
前峯暝野鳥下寒竹孤僧汲修綆聊欲遂幽尋理策度
西嶺雲中寺云天半雲中寺四山皆白雲我來雲際宿
却憶雲中君塢影當晴出濤聲入夜聞此中有猿鶴莫
勒北山文古意云美人豔南國顏色如朝霞昨來邪溪
上妬殺芙蓉花秦珠隨月滿越練逐風斜獨慕孤高義

今年尚浣紗此等詩超詣高格何減盛唐聞將謁公豫
章公延之東閣定被容接知山右有此清才惜其獲落
不遇也

先高祖致族祖
補念先生啟

瀛按蓮洋居中條風格幽勝清暉宵映王新城贈
詩所謂人煙盤亘驛村路玉溪流者世傳其狀貌
蠡陋不修邊幅然其詩如吳門初春云山鳥漫吟
泥滑滑吳孃偏唱雨瀟瀟此等風調那似河朔傖
父

本朝山左詩人趙清止宋荔裳王西樵阮亭諸公名滿
海內楊六謙與田子綸曹升六李漁村王仲威後先並

起施愚山云山左舊遊舉進士能詩者既有田子綸曹
升六王仲威諸子李漁村與卽墨楊六謙又同

召至都下不爲不遇吾嘗校其文拔最多士數來論詩
詩日有聞吾喜諸子之足張吾軍也讀味道樓詩能自
立一幟不肯扶同依傍者

聽竹山房詩話

畢頡雲清望人比之湯文正陸清獻當時爲其鄉環極
魏公午亭陳公所推重官終布政使未究其用嘗按察
吾粵有青天之稱今漸無有舉其姓氏矣詩文錄入

欽定四庫書目

馮敏昌粵東日記

葉井叔家樊上舉鴻辭不遇漁洋以詩送之云秋盡華

陽館千峯送馬蹄夢回山館裏落月汝南雞舊業在寒
溪門前五株柳游子到家時日上樊山口官指揮時竹
垞序其詩以爲清而婉麗而不靡戍削而無刻劃之跡
至於友朋山水之好流連唱歎而不已庶幾發乎情止
乎禮義可以化下而風上者

嚴繩孫蕩
漁雜記

黃州葉井叔封順治己亥進士仕爲延平府推官改登
封令遷兵馬司指揮初以詩介其宗人訥菴質余余曰
君之詩未也唯嵩山詩足傳耳爲序其嵩陽集刻之後
以博學鴻詞薦不見收自楚屢寄新詩求余刪定其鄴
中懷古二十首殆無一字不佳銓授工部主事未上而

卒漁洋詩話

葉井叔嵩山諸詩格高韻絕不減古人嘗寄己未庚申之作及郢中懷古詩二十篇屬余論次風格益高凡余所不可君應手竄改或竟剗削不自愛惜虛懷善下交游中罕見其比所著嵩山詩集已庚詩郢中懷古詩皆余所論次辛壬詩則自廣陵寄余未及卒業而君死矣

集鱸尾

瀛按井叔工部父錦林經歷黃州府時巡撫何騰蛟檄攝黃陂令先是獻賊陷黃陂民皆流竄先生安輯之民稍歸未幾卽殉節死工部貧不能歸流

寓樊上故應

召時籍隸黃岡顧張思題名記誤作武昌人未第
時王宗伯吳廬嘗扁舟過之值湖漲不辨涯涘日
已莫聞書聲出蘆荻中曰此必井叔跡之果然

經天緯地之謂文非雕章繪句之末也子以四教文爲
最先誠以進德修業非文無從開來繼往非文不傳黼
黻皇猷非文不著宏道統立人極非文不振則文之爲
文顧不重哉由是言之則世何可以無文而人亦何可
以一日不學文也余友椒峯陳子美秀而文落筆驚人
在陳子則自視若無恒欬然不足顏其齋曰學文堂志

有在也每焚香默坐鞭逼潛修凡成已成物之方道德
經濟之實靡不一一究極期見諸行則陳子之於文從
可知矣爲人器宇倜儻議論英發氣魄加人數等予對
之不覺心折一日招予飲席間以學文之義爲問予幼
孤失學絕不能文辭之再三不獲已第就陳子之所懷
口述其概以俟名世大筆記之

李容二曲集
學文堂記

陳椒峯負其才磊落自喜少與其鄉董文友鄒訐士交
善陽羨陳其年以弟畜之爲臨朐馮相國所知而鴻博
之舉竟以罷歸人稱其纂常州府志頗有體裁顧不爲

鄭堦陽立傳何歟

漪淥齋
叢語

瀛按椒峯先生之祖睿謨明季官鄖陽巡撫先生
家豪於貴治園亭結賓客世競傳椒峯與周公清
原爲僚壻周微時貧甚不禮於婦翁椒峯亦輕之
比膺薦周官翰林厯少司空而椒峯報罷以舍人
終周頗修怨於椒峯此殆齊東野人之語椒峯學
問博洽似在周上吾郡鄉先進俱云然又未可以
遇不遇槩論也

陳靄公少受業於其鄉高鏞淵穎高曾序溫庭筠八义
集見池北偶談靄公又及新城之門劉比部公祿計孝
廉甫草極稱其文靄公所爲邊大綬傳等作甫草尤譽

之嘗論文寓書於鈍翁鈍翁以書答之往復辨難蓋亦

北方之傑也

藕漁雜記

李劬菴一官拓落辛苦間關故其詩多感時撫事之作其立春夜感懷詩云聞道花門信甘州今尚圍城分猶拒戰兵久未成歸刁斗連邊動軍書入塞飛客懷無一可愁絕盼春暉余尤愛其賦雲云片片浮雲去愁人正望鄉東風吹送汝幾日到咸陽溫柔敦厚真得唐賢三昧

微雲堂偶記

李杞瞻汴梁竹枝詞云紅油車子賣蒸羊啟蓋風吹一道香王新城見之笑曰信陵賓客東京夢華古今來多

少感慨而顧朵頤於紅油車子之蒸羊此正呂頤浩所
云措大知甚好惡者余以爲竹枝賦詠土風卽事成什
新城所云正不足爲杞瞻病也秀水李良年最與杞瞻
善有柬家明府杞瞻詩云宦情閒五柳詩格勁三秦環

偶記

瀛按劬菴先生畫宗法元人清疎韶秀一如其詩
新城嘗題其畫云君家涇水上終南在當面紫閣
與黃陂宛向圖中見

吳星叟少時卽見賞於吾邑馬文肅公其學問博洽縱
橫馳騁亞於毛西河著述之富亦復相等顧西河集盛

傳於世而星叟撰著罕有見者小峴廉使官浙江錄其
數卷示余多關係明季文獻當與南雷文定叅看

俞樾
星叟

文集
跋後

許彝干少便歧嶷總角風氣更進嘗詣從祖原孝原孝
索冠見之左右曰孫見祖何復著此原孝曰此子是許

氏南來之秀

今世
說

許彝干嘗登浯溪大橋目城中青楓厯厯歎曰此樹不

知幾厯興亡

同上

趙韞退按察官湖西有詩百餘篇余取其南康登樓一
絕云返照臨高閣寒煙淡淡分城空何所有一半是匡

君

漁洋詩話

趙韞退觀察進美詠楓葉云郭外西風繞樹斜長林秋
盡有啼鴉微寒已入娟娟樹遠色初分淡淡霞千里題
書臨白鴈重陽疎雨映黃花洞庭木葉傷心日寂寞懷
人在水涯梨花云暮煙無語更依依清影含春望欲稀
疎近瑣窗留月照寒垂網戶見鶯飛共停閣外青絲騎
細舞燈前白紵衣莫向後庭歌玉樹故宮風雨已全非

同上

本朝詩人山左爲盛先清止公與萊陽宋觀察荔裳名
相埒同時繼之者新城王西樵及其弟阮亭而安邱曹

升六諸城李漁邨曲阜顏修來德州謝方山田侍御
舍人先後並起然各有所就了無扶同依傍故詩家以
爲難秀水朱竹垞南海陳元孝蒲州吳天章及洪昉思
皆云然

趙執信因
園集筆錄

陸翼王徵君爲陶菴先生高第弟子學行並卓詩亦不
染鍾譚習氣送袁重其歸吳門云尊前故舊凋零半亂
後文章感慨多送文介石學博歸滇南云三江日月孤
臣老六詔風煙萬里歸格調蒼涼劇似陳黃門一派

學一

詩話

瀛按翼王先生父昌期以椽起家官番禺沙灣巡

檢善治盜入名宦祠先生嘗授書常熟錢氏余國
柱巡撫江南聘爲二子師余內召復邀之入京或
以爲主非其人然在京師從諸鉅公徧借異書手
自繕錄至脫腕不倦積至千卷束脩大半以購書
籍子宗濰貢生先生命復王姓能擘窠書方正有

父風

安西估魏丙賢卉布上海市中夜就旅宿醉臥風雨大
作失橐金三百兩時上海令爲任待菴素善讞至是獄
不能定因詣城隍廟禱於神請以實告乃留捕隨往者
使待命於神寢宮捕夢寢宮有幼婦出右手抱細女左

手挈衣與之及接視則裙襴也歸以告令令俯首再三
仰而曰夫賜衣而得裙襴則非衣也非衣者裴也豈有
裴姓其人者耶捕叩頭曰似也閭左有裴愛無厲不事
家人產其人僦旅舍傍而得出入於其舍卽欲得裴姓
此當是令曰然然則其抱細女者抑可知矣夫細女愛
女耳吾聞納音女數陽姓從左今左非衣而右愛女其
爲裴愛無可疑者遂收裴拷之得實

今世說

任公名辰旦號待菴世蕭山人幼奇慧與同邑毛奇齡
王先吉韓日昌學同師稱四傑令上海縣時新令撤海
濱防軍公慮其乘間剽民財密請將軍行期故邀軍主

惟飲宣言期須遲緩次日將軍忽下令促即行公厚其
牛酒道上勞軍軍母敢遷延他顧居民帖然既以行取
補工科給事中連上疏請酌蘇松賦額以遂民生預籌
經費以貽良法慎用人以肅紀綱核廉貪以飭吏治酌
藩司護印以重憲職典湖廣鄉試得湘潭陳鵬年爲名
臣孫元文以進士教授嘉興與余善節錄齊召南
任待菴傳
陸雲士詩有性情最愛其出門云堂上有慈親身外無
昆季承歡賴妻賢託之以爲命弱女方四齡初知離別
意恐其牽袂啼深傷游子緒乘彼睡未醒溫存加絮被
拜母不能言揖妻交重寄此際心若摧出門方隕涕五

律如白溝河云厲鬼依殘骨畊人拾斷戈五溪云野豕
能飛箭江豚善拜風亦警句也

邵志純雲士
詩集跋後

程周量送魏子存司李成都云誰說蠶叢不易行春風
三月馬蹄輕銅梁舊枕秦山險玉壘新連楚塞平芳草
綠齊過漢水杜鵑紅盡到縣城知君篋底多詞賦論蜀
文應似長卿子存家武塘自湖廣僉事歸益工文章好
賓客陳其年常過從贈子存詞有湘潭鄂渚微雲灑人
爭羨文章宗主江山圖畫之句

侯淦留雲
閣筆談

青城負詩才工四六兼善書知名於時王阮亭彭羨門
各賦無題詩合而刻之號彭王唱和集青城爲之序

鶴微

輯錄

余丙午鄉舉計偕入都是用貢士法用策論易經義過吳門市坊門選本讀之獨賞儲廣期先生魁江左文余後登朝而先生宰於外不久引疾且甫及中壽故未獲相見

節錄李光地榕邨文集

瀛按儲廣期先生與陳檢討交善兄雪持迦陵詞內有爲雪持題像卽次原韻之作自注像作大雪中數燕姬箏琶交作意雪持工倚聲惜儲氏特以文知名於世無有傳其詞者近日陽羨史氏頗工長短句蓋亦迦陵之逸響也雪持名集慶鶴徵錄

以廣期雪持爲一人誤

王阮亭送李武曾之鳳陽幕句云故人惆悵題襟集好句玲瓏散水祠自註武曾嘗客公敵吏部近有樂府後補題諸調最佳武曾名良年嘉興諸生嘗應鴻詞科被放遨遊幕府足跡幾徧天下

蘭邨筆乘

李武曾嘉興三李之一合肥尚書集知名士爲文酒之會凡三十餘人武曾以墮馬後至燭見跋矣必俟武曾至乃舉爵孫退谷侍郎謝病著書與武曾爲忘年交汪堯峯爲文高自矜許獨傾心武曾曹侍郎申吉出撫貴州引之入幕旣聞三藩同撤知亂將作力辭歸武曾蓋

磊落士也今健菴尚書開書局于洞庭山武曾方與纂
修之役足下往訪尚書當與武曾相見讀其詩文知諸
鉅公之稱譽不虛耳

嚴繩孫與
劉震修啟

瀛按先生爲趙膳部武昔所薦生平富游歷故其
詩多行役之作爲文最傾倒於鈍翁其編次文緯
蓋亦得鈍翁之商榷者居多惜其書未成無從購
覓其凡例僅見於先生曾孫集所輯鶴徵錄中先
生與朱檢討同里閑交善先生前沒檢討怪鷗行
云去年怪鷗鳴我池上柳喪我前村詩人李十九
賈崧按竹垞檢討嘗偕徵君入都遊西山題詩於

壁傳鈔者不絕一時朝士爭欲識之每召客輒詢
坐中有朱李否檢討有慈仁寺夜歸同李十九對
雪兼有結鄰之約詩云暝色辭沙界蓬門更掃除
數錢燈下酒入饌雪前魚遠作比鄰約相連水竹
居扁舟當此夜來往意何如

吾友吳園次有快壻曰江子辰六詩才清絕阮亭極稱
之辰六之歸廣陵也園次以文贈之云三年灃浦思公
子以無言十月平原喜酒人之尚在又云得謝家之詩
句願效廷堅傳韓愈之文章期同李漢園次自負其才
而傾倒於女夫者如是

微雲堂
偶記

歙縣江閭辰六漁洋山人之門人也性孤介詩尤清警
絕俗與吳天章徵君交善有喜吳天章至自蒲坂詩云
相逢冰雪候相對兩蕭然有楊留徐釋無錢與鄭虔更
深重話舊翦燭欲忘眠不識千秋後詩篇若箇傳漁洋
贈詩有云詩成閒拄笏雲際九疑煙可知其品格爲世

推重矣

雪亭
載記

徐熊飛按辰六刺史有借書圖當時名公題詠甚
盛王新城尚書云何處淹留可判年亂書堆裏日
高眠何人解似宣城守手爲江郎割半瓊又云飲
馬荆江戍火紅麗眉書客悔雕蟲諸生亦有封侯

相一卷陰符兩石公刺史嘗令吾楚之益陽有善
政

吾邑葉氏華要甲天下九來尊人白泉工部掩映風流
一門羣從如蜎初子吉皆成進士子吉尤以高第官侍
從著盛名於時惟九來莠儻不羈頽然自放常往來於
桃葉酒家鳴珂狹邪間猶有承平公子氣象所居半繭
園花木明綺池館崢嶸泓勝流名士過從無虛日調琴養
鶴置酒徵歌其沒後亦不可問矣

先外祖二磯山人詩話

田髯淵少時名善屬文陳黃門謂夏考功此子才氣卓
犖他日必成偉器後黃門歿子幼貧墓傍荒田數十畝

髯淵代內官租二十年復與友人梓其遺集謂客曰無以償黃門大德生平每以爲愧

今世說

田髯淵妻孥終歲布衣糲食客到治具甚盛留累月不厭後進有詩文就正有小好必極口稱許世謂髯淵家貧而能好客才富而能好善

同上

順治丁酉江南科場事發覆試之日命題二書一賦一詩監試官羅列偵視堂下列武士銀鐙而外黃銅之夾棍腰市之刀悉森布焉未刻繳卷諸生文皆如格撫臣以覆卷奏進乃解復原名先生其一也惟有據者遣戍數人世皆以吳漢槎兆騫孫赤崖暘爲可惜云

鶴徵錄

汪淮按鄆淵先生負氣抱奇其詩如貧交行孤兒
行沈文憲皆錄入別裁孤兒行感慨嗚咽尤得古
樂府勝境詩云孤兒啼聲何淒然問汝啼何爲長
跪荅言父爲南海太守居官清廉不枉取一錢鳴
騶吹角大吏巡邊前導到部聲喧闐晨報謁不得
前夕報謁不轉前急從販繒者貰繒百聯獻之幕
府大不歡曰此邦舊有百斛珍珠船大吏朝去境
夕拜牋守此海邦另擇名賢烏白鷺黑上下茫然
父羈南海不得旋客死歸黃泉兒負嫠母跋涉山
川乞食路間望見大吏鳴騶吹角仍巡邊猶嗟父

骨歸何年南海太守不傳其人惜哉

己未詞科錄卷十二

通議大夫廣東提刑按察使司按察使無錫秦瀛輯

叢話 四

鄧肯堂幼有神童之目年十三賦空谷詩爲松圓詩老
所賞遂以此得名人呼之爲鄧空谷後以薦舉入都沒
於逆旅所著頤菴玉山柳下諸集散佚不可問嘗見其
贈如臯冒徵君詩旁若無人惟燕子不知有漢是桃花
之句余最愛之

柳南
隨筆

莆田林堯英官戶部主事己未以鴻詞徵五七古拔奇
於韓見有七八篇附在宋吏部西陂類稿田戶部古歡

堂集

杭世駿榕城詩話

代州

國初號振武衛故馮訥生副使著籍曰振武衛人沈長洲尚書別裁集選詩二首曰雲棧曰鳳嶺蓋副使入蜀作也今按副使所著有雲中國雍等集無蜀中詩意或別有刻本或未刻者多而見於它選未可知也

李錫麟山右詩存

瀛按訥生先生集中有潼關行紀雁門司馬及喬公遷高闔門殉節事起句云潼關城下月如水潼關城上鼓聲死中云孫公灑血潼關道鬼馬不歸

嘶碧草末云同時飲劒有喬公呼天拊膺氣獨雄
腰橫寶帶眠顏堞手擲頭顱向晚風詩頗悲壯可
誦其五言邊塞之作亦似高岑一派

宋先生維藩著有白雲閣集詩極清綺嘗和楊仲延寶
華洲韻云一湖蒼翠護城灣高閣登臨晝掩關涓滴流
來曹洞水雲烟堆出米家山遊魚應識濠間樂舉世誰
知竹裏閒不謂使君多逸興尋詩終日竟忘還

鶴徵錄
續補

白蝶菴少與兄夢鼎同尚志節當明末俱以公論忤貴
人陷於獄母陳氏怡然曰子爲范滂吾獨不爲滂母乎

會國變得釋

鶴徵錄
續補

往者見寶名於姜侍御座間已知其詩不詭隨及與予同舉制科時諸賢各以詞業投相公幕下予從高陽益都兩相公所讀寶名詩怪其違時而孤行暨予歸田後僦居杭州在昔同方講藝文者皆老死無復存而寶名巋然往往相見道故舊外自傷年及桑榆經學之不明又何暇及藝文事而寶名之詩則哀然爲學者所宗豈非主平時而不與斯時爲低仰者與寶名抱長才重與時違四方羔鴈不絕於世聲名播寰宇其作述之盛何止聲律嘗爲貴陽使作龍番諸志惜先我而逝徒以遺詩數卷拭泪眼而爲之校讐也

西河集徐寶名詩序

徐大文將遊豫章其友吳慶百林玉逵送之時徐年少慷慨涉江遙指笑曰吾過洪都惜子安已沒無可與言詩者客或乞吾書正恐麻姑碑板差見吾耳

今世說

瀛按寶名爲巡撫陳公秉直薦舉雅善詩歌尤長於史學

黃靜御七絕云溪西人家秋水生孤舟常自三更行一聲啼鳥半江月才到兩山天欲明風調不減古人漁洋極稱之載分甘餘話又錄其詩入感舊集

詩話

王山長嘗讓杜于皇傲慢不求友杜云某豈敢如此只是一味好閒無用但得一覺好睡縱有司馬遷韓昌黎

在隔舍亦不及相訪也

居易錄

湘潭王山長能詩文官京衛府學教授十餘年不遷泊如也善嚴司農策蹇往來蕭然寒素

松窗筆乘

吳騫按山長與施愚山先生交善先生序其詩云潭州王君山長博涉羣籍卓犖自負不隨俗俯仰放遊山水所至與賢豪交歡用氣誼相然諾與之言侃侃四座莫能難蓋先生之傾倒山長如是其詩文欽崎厯落顧嘗著說爲武陵奪情訟冤殆山長好護其同鄉而不免是非之謬也

賈崧按山長大令以畫山水寄劉杜三自題云二

壑一邱高枕閒經年無事不開關却知門外秋冬
換黃葉庭前積滿山其用筆細秀氣味古逸有元
人矩矱今在馮魚山比部敏昌處

今世說稱宋旣庭醇靜寡欲動止皆有常則然迦陵集
中有醉花陰一闋爲吳門晤澹心園次展成旣庭石葉
諸君感舊而作詞云昔年相見臯橋下總是清狂者惜
別泰娘家淚黦胭脂冰了鮫鮪也想見諸公風流跌宕
旣庭亦是迦陵一輩人也

旣庭

高菰邨先生嘗爲吏科給事中章奏屢上皆秉禮執法
多所彈正工詩文善書畫得者多寶藏之有長亭怨詞

送先徵士公之濠州云見寒柳一枝斜偃試折空條恰
憐秋晚樹隱青帘短亭人去夕陽遠郭家荒宅應猶賸
殘書幾卷舊日濠梁魚縱樂和誰同看題怨野橋分袂
後慵到向時吟館重繙小譜怎忘得竹根擎瓊甚涼雪
也帶愁飛悵鴈影半行催斷便夢繞淮南攔把蜨坊尋
遍尾末自註云濠州郭近澤傳寫書籍至萬卷號爲書
藏錢易詩云郭家書藏舊焚香數盡書來宅已荒夢蜨
坊中人不見昔年門館共淒涼此照玉田集兩闕填其
第五句遠遊歸後共誰語詞綜後作時想刻本訛也字
法亦極似香光洵爲能品

鶴徵錄
續補

余在蔡大將軍幕有人爲余言吳三桂叛延安同知譚吉璫運陝中餉十萬入鞏至寧羌會兵變經畧莫洛被戕巡撫杭愛移駐漢中遣還所運餉漢中食且盡棧道梗阻乃從黑水峪間道七晝夜達盤屋旣抵榆林副將朱龍反吉璫設法死守榆林得完未幾西川入周繼明結連叛將復陷延安綏德城中乏食吉璫又謀於上官率私錢命壯丁所經買粟鄰境突圍以入城卒無恙圍旣解吉璫功稱最

稿永福濟
閩紀聞

瀛按舟石先生治經甚勤亭林嘗言叩其書齋插架十三經注疏手書朱墨始終無一誤句

汪淮按舟石先生行七弟孝廉左羽瑄行十一舟
石之官延安其中表弟竹垞翁方在京師偕程周
量高二鮑申叔旆李武曾沈廩臣汪季角以九日
集刺梅園松下送之聯句得四十韻見曝書亭集
其後又有譚孝廉十一兄歸自楚粵訪余維揚喜
成三首兼懷郡丞七兄在榆林詩譚氏宅在嘉興
郡治東北碧漪坊庭有鴨脚柳三本

鶴觴負才雋異淹雅博聞胸次瀟灑虛懷善下文極工
妙有刻意彈射者輒欲下拜至與朋友往還必以無所
規益相督宦轍所至著聲績爲羣吏冠

今世說

瀛按會侯先生有垂綸圖一時勝流詩文題詠備
見於諸名公集女許字方渭仁子奕昭奕昭死女
墮樓以殉遇救獲甦毛西河陳迦陵兩公爲之序
汴梁王金章叅政常從老儒劉文奇學崇禎末劉家沒
於水王爲置田園廬舍於蘇門山中後年七十餘病卒
爲之營塋情理具備予見其哭師詩哀樂有過人者其
警句云門無車馬求書使室有黔婁正被妻餘不具錄

漁洋
詩話

膠州法黃石高平畢亮四學問淵博所撰著皆艱深古
奧不欲輕使人上口筆九晦澀至不可讀蓋樊宗師一

流人也

松窗筆乘

予赴京師路遇徐仲山忻然同行曾於良鄉北旅店見
題壁詞迥出恒輩其詞曰灑盡窮途淚看少年一番行
役一番顛顛雨雪霏霏泥滑滑上馬屢愁顛顛又況他
金輪西逝屈指離家能幾日早行來已是三千里嗟歲
月似流水蒙茸漸覺羊裘敝怎當他朔風淒緊裂膚墮
指莽莽長途誰是主燈火前村近矣只無奈望門投止
沾得濁醪聊破冷向燈前獨飲難成醉天未曉又催起
特不署姓氏不知爲何人作及到京錢塘俞季璫投以
詞名京師雜感共九章皆滿庭芳調其首章卽是詞也

但半愁盈紙仲山怫然曰甫來京而得是詞其能頃刻
留此地耶後仲山應試失第不穀資斧每依其同姓官
京師者仍不得歸去嘗過予飲曰予初賞季璫詞今恍
自道然予究薄季璫去留快然何必爾爾耶予因詢之
仲山舉其第六首前截曰撫劍悲歌罷望長天驚風颭
戾橫河傾瀉有客訪予予已醉且自坐君牀下有至語
語君休訝餐菊紉蘭徒自潔看夷光未字無鹽嫁非詭
遇賤工也第九首後截曰襟懷嶽嶽和誰語笑卞和楚
庭泣玉徒多悲苦我有草堂東郭畔管樂何妨自許且
抱膝長吟梁甫有志男兒非困頓彼掃門魏勃何須數

不如意且歸去

西河詩話

老友徐仲山以七夕死予自哭子喪明後不能作哭故舊詩時哭友詩三百零首祭文百零首一夕焚去以爲學識未達多此啾唧今集中並無哭友題并祭文一門部可駭也適徐昭華以禁日哭父擬木蘭詞寄予予讀之不覺淚下然仍不能作哭詩卽以此存集中當哭仲山作時汪東川司成在坐曰聲調哀苦體致愴惻有女如此卽以當木蘭何過焉其詩曰戚戚復戚戚天孫罷機織只道天邊歡會期不道人間別離日人間別離真可憐天邊歡會知何年悽悽登我堂不聞烏鵲喧但聞

老母痛哭聲連連愀愀入我房不見瓜果陳但見蛛絲
蟲網相鉤牽前年當此日天河正瀾瀾分將五色纓聯
作百年卮去年當此日天柱方傾頽桂陽城北乘羊去
緱氏山頭跨鶴歸况復今年當此日百歲堂前喪靈匹
欲曬麻衣兩淚懸但啟書樓寸腸磔天河有時挽天星
有時轉惟有乘槎一去人萬古千秋不復返穿針徒望
眼不使淚眼親九華空照地不照下泉人黃姑此夕依
然度惟有嚴親不知處木蘭空是夜停機願代爺行竟
無路戚戚復戚戚作此七夕詞欲知此日中心苦視此

河流無盡期

西河詩話

瀛按仲山夫人商嗣音故太傅公之季女太傅旣
殉國難嗣音於家國興亡之際有餘恫焉迦陵序
其詩云翟泉鵝出關河之淒愴何多陳寶雞鳴身
世之感傷不少夜月歸寧則太傅之池臺安在秋
風憶舊則尚書之粲戟都非激楚悲涼感均頑豔
矣仲山之沒其女昭華作擬木蘭詞西河錄之余
嘗謂古人無哭父母詩以詩近於樂居喪宜哀不
成聲也昭華此詞有乖體製然此義固未可責諸
閨閣中人耳

侍御傅彤臣余同邑同年也順治辛丑請急歸康熙戊

午應博學鴻詞之徵明年報罷往來滄州道中感秋柳
賦詩二十首多可誦身後著述散佚聊錄數章於此以
見一斑云漸橋橋畔美人居性慧能爲倒薤書一觀靚
容頻問訊十眉新樣近何如絕代容華照眼明幾年聲
價重金城誰言青鬢垂垂老一到臨風百媚生零露蕭
晨半未乾日高猶自怯輕寒連錢驄馬驕嘶過青眼樓
頭帶笑看殘照芙蓉溢額紅珊瑚骨節玉瓏璵幾番瞋
起嬌無力披拂偏宜少女風垂金小篆不曾譌葉葉紛
披撇與波截柳編蒲無用處祇傳新樣似元和靈和殿
裏見丰姿成薛航情寫豔詞九月受風秋色裏泊遊心

醉麴塵絲拂堤又復映征帆折贈還宜女手摻薄暮一

番微雨後江州司馬溼青衫

古夫于
亭雜錄

瀛按新城尚書有趙北口見秋柳感成二首絕句
自注順治乙未予上公車與家兄吏部傅彤臣御
史賦柳枝詞於此忽忽十餘年矣隄柳婆娑無復
曩時不勝攀枝折條之感因賦是詩

侯仲輅先生官閩縣令有堂聯云此地百行有柴米有
茶酒有紗羅有珠玉有行行都有如我敢將那項取之
官一事無火耗無雜派無贖鍰無答應無事事皆無在
人猶作富翁看

聞見
錄

宋懼聞明諸生曾遊京師作感遇詩百首中書朱南隆見而愛之會徵鴻博急以名上下郡邑迹之卒不可得平日習西河之說頗訾紫陽於大學九肆詆譏別作古本解疏子倅松江至署不久而卒子亦沒無後從來毀朱子者輒至絕嗣吁可畏哉

潞溪筆記

陶紫司先生爲先宮諭甲子順天鄉試所得士作令海表偃蹇以終曾伯祖泉南山人以詩哭之極哀論者謂先生居京師方望溪侍郎嘗痛詆其文以是先生之子晚聞太常卿恨侍郎侍郎暮年降官晚聞與有力焉此未必然侍郎論文與吾吳何杞瞻汪武曹及先生初不

相中而未嘗不在交遊之列見侍郎爲武曹墓表何至
詆訐不合致晚聞啣恨大骨耶

也軒
筆記

瀛按先生有臬司劉公枉書惠存詩云一官萬里
尹蒿萊幾個生前歸去來又云從此不愁風土異
生還終望我公哀和唐張謂云人言瓊管曾開府
我道囚山合挂冠又云徼外山河逢帝醉心頭鐵
石向人寒抑何言之哀也事雖得白而終沒於崖
州於其心聲見之矣

雲間董二孝廉最善賦學如鏡賦驚賦採桑賦皆清婉
流麗可與吳兵曹綺顏顏又有送客入都詩云蕭條易

水逝驅馬向金臺岸柳春前放江鴻雪後來語極澹雅
有自然之致

說鈴

蒼水丁巳年入都與漁洋山人倡和頗有知己之感其
北遊草云余所寓蕭寺與阮亭先生寓齋相望晨夕過
從四方風雅名流至輒邀余晤對誠快事也

紅豆山莊文集

雲間董蒼水負才名試鴻博罷歸漁洋以詩送之云昔
作甌閩客漳泉正合圍江瑤驚旅食山鳥怪儒衣邊徼
逢人少諸侯好士希長篇猶在篋感激涕交揮

一峯詩話

王豫按蒼水有落花篇芊綿婉麗初唐四家之遺

沈文慤選入別裁集

侯官張一衡受知於魏敏果其詩無傳於世僅於感舊
集中得讀史詩一首云舞陽變色後無人信童子何況
來俊臣羅織疑人使童子沒宮中宮中誰坐起前後左
右間無不承后旨諸王縱有心何敢與接耳天心欲祚
唐大誘於其裏昂昂十歲兒從天降丹陛

沙村
偶記

余昔與章邱潘吏部同赴楚軍有武昌城下送吏部先
赴江陵詩云與君久向山中臥何意重歌行路難被

詔且容稱散吏逢人莫道舊朝官沈沈落月江城閉去
去扁舟楚澤寒早晚荆南同作客班荆便似故交看既
而余又與吏部同膺薦舉吏部罷歸不通訊問久矣雪

泥鴻爪爲之惘然吏部名颺言字陳伏

微雲堂雜錄

僉憲許生洲先生示余以施侍講思硯齋記先是僉憲大父中丞公爲紹興守得硯於臥龍山麓刻天然硯三字畫其背爲東坡小像中丞寶之終身兵亂失去子封奉直公追念出涕因營齋而居之以思硯爲名僉憲官京師遍謁於所知求詩文以述其尊先生追慕之至意而冀少慰其思侍講謂奉直公能不匱其孝僉憲能曲成其志信也

湛園未定稿思硯齋記

四山督學秦中數載不得其音問戊辰從郵筒兩得其華嶽集時選事已竣採其高篇復爲附入校士方冗乃

能吟咏如許之多且高華沈鬱俯罩詞壇其胸次何如也

詩觀注

李天生評許生洲華嶽集云處處言情却處處是景建安而後惟杜少陵耳公詩乃能之則其推挹之者至矣生洲督學秦中得詩最富所刻華嶽集是也李天生所選訂天生與生洲同膺鴻博之薦氣誼尤篤故說詩最合云

詩龕雜誌

葉方蔚爲初菴先生之弟與其從兄奕包並膺薦舉先生適爲閱卷官時尚無迴避之例二葉不中選或遂以此歸咎先生且謂先生忌奕包名出己上又與方蔚素

不合平時數凌其弟於閱卷時故抑之此甚不然試思當時

朝廷雖甚寬大閱卷官焉敢顯以胞弟從弟並置高等
吳農祥言

上嘗詢諸大臣此外豈無遺漏先生以奕包對且操土
音曰臣若不舉臣弟當啣恨次骨先生必無是言農祥
亦因見遺而發憤懣之詞耳或又謂嘉興李武曾亦在
選中因與奕包交契并匿其試卷先生長者不應有是
此謗者之言也鈍翁志武曾墓謂被忌者所抑不知何

指二磯山
八筆記

張韞璘工詩詞清綺多姿致有雲棲送客詩見稱於世

鶴徵錄
續補

西安徐若谷先生成進士司李雲南既令陝西安化營
以單騎赴賊寨招安其衆會王輔臣構亂平慶相繼陷
以蠟丸達書督撫擒斬僞帥既而賊兵大至被執不屈
幽禁之逆黨吳占春力救得免事平將軍圖海檄補眞
寧令薦舉後移茂州部臣以前失印事被議落職退居
林下者二十年

鶴徵錄
續補

王任菴先生知西寧八年訟庭闐寂甲寅孫延齡反陷
梧州西寧距梧八十里梧鎮帥班際盛欲移師避寇先

生與際盛書極言不可相距二十餘日賊果退梧州初陷先生繕治城守具賊引軍寇西寧先使諜持偽劄至知有備乃遯去於是以治最膺薦行取尚可喜忽具疏請留行取官先生度可喜予之信必反遂移疾歸戊午薦舉後遂不出家居三十餘年

鶴徵錄續補

王仲威暑窗臆說山繭一條甚詳曰藥溪譚記禹貢萊夷作牧厥筐縶絲爾雅曰縶山桑師古曰山桑之絲其韌中琴瑟之絃蘇氏曰惟東萊有此絲以之爲繪堅韌異常萊人謂之山繭紬爾雅又曰蠨桑繭雖由縶繭今萊陽之山繭紬蓋縶繭也按山繭卽禹貢之縶絲今之

山紉檮繭又別一種乃今之檮紉也檮不才木土人嫌其名故借名檮取莊子大檮之義然則爾雅所云蠟桑繭卽今山桑縹絲是也雖由檮繭今檮紉借名檮繭是也

香祖筆記

今士之能詩文者莫不待詔

闕下新安程君兼三遊京師哀然舉首余從江君辰六得觀其所爲文一日介朱君繼菴以其詩屬余爲之敘君負才不偶所爲詩未嘗輕示人顧乃抑然善下就拙工而問繩尺然則君之虛懷誠不可及也

方潤仁文集程兼三詩序

徐圃臣清引堂集謂戴蘿軒本松江藉徙居當湖嘗有

春藻堂讌集詩錄寄先徵士公云物候三秋換賓筵兩
地分遠方欣命駕終夕與論文屋角明蟾魄天風落雁
羣百年幾歡會揮手謾紛紛

鶴徵錄
續補

願寧人與吾友歸元恭同里聞元恭守鄉曲而寧人出
遊四方所至墾田自給其甥徐健菴勸之歸不肯歸當
事欲招致史館亦堅辭不赴元恭嘗邀同社諸君子會
於影園余以病不果往而元恭旋歿余以詩哭之又爲
文祭之曰先生道喪士習懦傾孔子有言必也狂狷歸
奇顧怪一時之選漁獵子史貫穿經傳志高氣盛雄傑
魁岸顧遊四方燕塞秦甸君獨閉門枯守筆硯跼蹐不

羈俗人笑嫻抱太僕文蒐蘿拾攜胡忽隕亡逝如飛電

徵雲堂
雜記

王芝廬先生工於詩七律尤擅標格送嫻雲道人還滇
中云身當持鉢飄零日魂憶投詩慟哭時借伯氏周臣
過織簾先生故居同顧伊人過陳確菴夜宿云猶見康
成遺故籍忽思元亮老荒邨於故國遺民惓惓不忘詩
亦琅琅可誦

二磯山人筆記

徐東癡與顧亭林王端士費此度諸名士於康熙己未
當事皆欲以鴻博薦舉俱力辭不就王漁洋與東癡爲
中表兄弟稱其詩近陶淵明孟東野辛亥秋余邀翁覃

谿學士過筠圃草堂閱舊本書有東癡漁洋手校邊仲
子詩本內跋語二則東癡墨書漁洋硃書學士摹成神
似今藏余齋題者甚衆

詩龠
雜誌

瀛按先生九日得顧寧人書詩云故國千年恨宅
鄉九日心山陵餘涕淚風雨罷登臨讀此詩可知
其願以遺民終矣宅人但稱其和新城秋柳詩以
爲遠勝原唱尚未爲知先生者

鄞聞天迺著有環流草堂集見續耆舊錄其舉鴻博則
巡道許宏勲力薦力辭不赴嘗爲張太傅肯堂堊一門
遺骨尤可傳也

俞思謙
筆記

萬季野至京師東海徐公欲援例子以七品俸稱翰林院纂修官季野以死辭遂以布衣參史局自王公以下皆呼爲萬先生而季野自署祇曰布衣萬斯同明季督師之姻人方居要津乞史館於督師稍爲寬假季野歷數督師罪以諗之其介然不阿如是

也軒筆記

瀛按先生私諡貞文學者稱爲石園先生望溪侍郎表先生墓全謝山議其多失考据且謂先生卒於王尚書史局中侍郎身在京師而曰先生卒於浙東欲弔之而無由其言大可怪謝山爲先生鄉人言必有徵也

費此度少遇逆獻之亂竄身西域不毛之地已乃溯漢
江下遊吳越居淮南老焉常寓泰州州守爲除徭役密
跛足往蘇門謁孫鍾元先生稱弟子

漁洋詩話

瀛按此度以大江流漢水句見稱於漁洋余愛其
隱者詩云老翁久深隱結屋巖石間春日采芳芷
夕陽行亂山無事入城郭獨負壺尊還便欲隨芒
屨白雲相與閒平居云故國不可到春風吹閉門
雲移峯頂寺花落雨中邨事簡人過少山深榻自
尊無書傳弟子耕鑿任乾坤樓中詩云棧閣通秦
道青天不易行盡過奇絕處不負有平生白馬巖

中出青牛壁土耕野花埋輦地幸蜀只虛名此等
詩純是唐音

明熹宗朝禮書李思誠曾麗逆案其孫映碧先生常以
爲疚少時卽厲名節居言官侃侃著直聲在南都疏請
諡建文殉難諸臣入

本朝屢膺薦辟不赴時年已屆八十矣竹垞壽詩云棗
園先世家海濱早成進士官於鄞按垣竹垞厯八舍抗
疏豈憚批龍鱗曾聞過江上封事神人觀聽交歡忻方
黃鐵練名盡易榜祠本末金以新電光石火雖暫照猶
勝霧縠窮塵傳之百世終不湮先生用意良苦辛邇

來閉戶三十載著書更比當年勤東京舊事孟元老北
盟新編徐夢莘藏之名山自怡悅使者徵索推蒲輪先
生穩臥南溪濱白蕉之衫紫荷巾三詔六聘催未起衡
門但與沙鷗親年今八十猶抱真齒兒髮秀目綠筋立

談古昔猶斷斷

薦觚
雜錄

瀛按先生從父信字瞻鹿官和平知縣與其子泓
遠淑遠皆殉國難從弟沛潑沂並有詩名沂風格
尤勝如聽楊懷玉彈琴云楊君善彈思皇操自言
崇禎末年作又與魏叔子善贈詩云魏子欽欽目
如電董子祠旁忽相見其感觸悲咽之志時流露

於琴歌酒座之間

門人崔華太倉之直塘人性孤潔寡合吳梅邨目爲直

塘一崔

池北偶談

余於書肆買一畫冊不著款淡墨抒寫得大癡筆意及驗其私印則崔華也按華太倉人漁洋山人分校所取士詩亦清拔絕俗爲山人所稱許此冊一十有二俱有

對副

詩龕雜識

瀛按不雕有櫻桃軒集余愛其五言宿山居禪院云僧語向夕久竹關燈半紅溪深石爲雨夜定松亦風窮矣竟何去杳然疎磬中相期惟好道倦馬

綠陰叢詩格高淡又宋如意和歌云羽聲旣凜冽
陰飈吹大荒驅車過金臺目已無咸陽余亦從此
逝無人燕市傍音節又何蒼涼悲壯也漁洋懷不
雕詩云藉甚崔黃葉才名二十年

夏宛來被薦時浙江學使程某試湖州爲一戚舞弄以
簋簋不飭見劾詞連宛來宛來上書於總憲魏公環極
自陳其誣然事未得白竟不獲與試宛來負才磊落而

窮於遇可惜也

袁鈞陶
軒偶錄

西溟先生嘗寓吾邑與秦嚴兩公相唱和詩多見於葦
間集尤與黃夏孫瑚善先生父相侯與其母孫孺人壽

夏孫爲壽序云四明姜子西溟以古文名天下歲戊申
來吳中吳中之士皆交驩姜子姜子與其友遊處甚樂
也而意常若有憾者母夫人年六十尊人先生明年亦
且六十姜子念無以爲親歡告於其友索爲詩古文以
歸爲壽而意若有憾者自傷其貧也文通首皆悲西溟
之窮而夏孫亦隱以自寓其後戊午薦舉葉訢菴嘗念
及夏孫而夏孫已早沒年僅三十八夏孫古文得史遷
八家之神而不顯於世世無知有夏生者蓋夏孫視西
溟更爲不幸矣

顧棟高萬
卷樓筆記